

Na osnovu člana 13. stav 2. alineja 5. Zakona o principima lokalne samouprave u Federaciji Bosne i Hercegovine ("Službene novine Federacije", broj: 49/06 i 51/09), člana 2. i 27. Zakona o privremenom korištenju javnih površina na području Kantona Sarajevo („Službene novine Kantona Sarajevo“, broj: 20/04, 26/12, 32/12 - Ispravka i 24/15), te člana 70. stav 1. tačka 2. Statuta Općine Vogošća ("Službene novine Kantona Sarajevo", broj: 27/14 – Prečišćeni tekst, 14/15 i 9/20) Općinsko vijeće Vogošća na sjednici održanoj 30.11.2023. godine donijelo je

ODLUKU O DOPUNI ODLUKE O PRIVREMENOM KORIŠTENJU JAVNIH POVRŠINA

Član 1.

U Odluci o privremenom korištenju javnih površina („Službene novine Kantona Sarajevo“, broj 7/06) iza člana 14. dodaje se novi član "14 a" koji glasi:

Odobrenja za privremeno korištenje javnih površina u svrhu postavljanja montažno-demontažnih objekata (zatvoreni/otvoreni tip bašte) uz ugostiteljske objekte izdaje Služba za investicije i komunalne poslove Općine Vogošća. Odobrenje se može izdati za postavljanje bašti koje sadrže montažno-demontažnu podlogu ili tendu sa dva (nadstrešnica sa središnjim nosačima) ili više oslonaca (montažno-demontažna otvorena ili zatvorena konstrukcija – pergola) pod slijedećim uslovima:

- tenda ne smije biti trajno pričvršćena na tlo temeljenjem, ankerisanjem niti može biti naslonjena i pričvršćena za fasadu objekta kolektivnog stanovanja bez saglasnosti etažnih vlasnika,
- tenda sa središnjim nosačima može biti sklopiva s rolo mehanizmom, dvostrešna ili jednostrešna i smije natkrivati samo tlocrtnu površinu bašte,
- pokrov koji se koristi za prekrivanje tende mora biti otporan na istežanje i isti je nezapaljiv, što se dokazuje tehničkom dokumentacijom i atestom proizvođača,
- pergola mora biti izrađena od profila od čvrste legure, otporne na koroziju, odnosno čeličnih ili aluminijskih plastificiranih profila, učvršćenih u montažno-demontažnu podlogu (podest) na način da je oslonjena na tlo, odnosno ne čini građevinu i nije dozvoljeno postavljanje/ugrađivanje čvrste opreme, betoniranjem, zidanje na javnoj površini,
- pergola zatvorenog tipa sa tri ili sve četiri strane mora biti projektovana i postavljena tako da bočni elementi sa podnom platformom i sjenilom čine konstruktivnu cjelinu, da budu u funkciji ograde, zaštite od buke, izduvnih gasova, vjetra, kiše i drugih atmosferskih padavina i moraju biti transparentni i izrađeni od prozirnog i bezbjednog materijala s elementima za otvaranje u ljetnom periodu,
- udaljenost pergole zatvorenog tipa od ivice kolovoza mora biti minimalno 3 m, od ivice javne površine za parkiranje vozila, susjedne pergole, pješačkog ulaza u zgradu, dvorišta, pasaža ili garaže minimalno 1,6 m,
- osnov za izdavanje odobrenja za postavljanje bašte koja sadrži tendu je projekat koji uključuje statički proračun konstrukcije izrađen od strane ovlaštenog lica odgovarajuće struke za projektovanje, koji sadrži: grafički prikaz bašte (tri projekcije i karakteristični presjeci) sa razmještajem svih elemenata koji je čine u razmjeri 1:50 - 1:100, prikaz elemenata bašte (crtež, fotografija, prospekt), tehnički opis elemenata bašte i načina montaže, za koje je potrebno pribaviti saglasnost zaštite od požara i eksplozije, zaštite na radu.

Visina naknade za korištenje javne površine, ukoliko se na lokaciji nalazi montažno-demontažna konstrukcija zatvoreni tip za period od 01.01. do 31.12. tekuće godine mjesečno za 1 m² iznosi:

- prva zona 7 KM/m²
- druga zona 6 KM/m²
- treća zona 4 KM/m²
- četvrta zona 3 KM/m²
- peta zona 2 KM/m²

Visina naknade za korištenje javne površine, ukoliko se na lokaciji nalazi montažno-demontažna podloga ili montažno-demontažna konstrukcija otvoreni tip utvrđuje se kao i za postavljanje stolova uz ugostiteljski objekat.

Član 2.

Rješenja o privremenom korištenju javnih površina izdata do stupanja na snagu ove Odluke, ostaju na snazi do isteka roka utvrđenog u rješenju.

Član 3.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj:01-02-2107/23
Vogošća, 30.11.2023. godine

